

GALATABO

Galatabo qui Pablonen raanni joi

Galacia mehabo qui Pablonen joi raanei

1 ¹Hea Pablo tah hen Papan raanti joni qui. Jaabaanbi shinanxon ta hea jahuen raanti hihti tsoanbi yohiyamanishqui. Papan jato shinanmaha yohiyamaribiquin. Noquen Papa Dios betan noquen Hihbo Jesucristonen yohihah tah hen jahuen raanti qui. Hihquipi bi Papan teehimaribihah ta jaanbi hea yohinishqui. ²Hea manahi noquen huetsabo betan tah hen mato yohihi, Galacia mai meha noquen huetsabon. ³¿Papan shinanya man siripi jihueyamahin? Noquen Hihbo Jesucristonen shinan hinanah man siripi jihueyamahin? ⁴Nea tiroma nete queha noque bihinihniyanoxon ta noquen hohcha copi mahuanishqui, Jascahue noquen Papa Diosen jaah. ⁵Hahxon tah min noque jai Papan hahqui jihuenahue.

Huetsa hahan hohcha potati joi yamahi, Cristona huesti

⁶Papan ta matohon shinanxon Cristo raanxon Heen baquebo sca hihnahue janishqui. Jan jascajaquin hahxonah bi tah man histon jaa jenehax huetsa joi qui mahnejaquescai. Rahte tah hen jai, man jascaraiya. ⁷Man hahqui mahnetai ta Criston joi ma qui. Caibaan ta mato tiromajahiqui. Criston joi siri ta mato huetsa shinanmacatsihcaniqui. ⁸Non

mato yohini joi huetsajacatsihquin huetsa joi sca non mato yohihi jaiya, noque hani chihi perehihnatai qui noque potanon. Papan yonotinin que bi huetsajaquin jan yohihiya, hani chihi perehihnatai qui jaa potanon. ⁹Mato yohixon bi tah hen hahquirihbi yohihi: Non mato yohini joi huetsajacatsihquin huetsa joi sca mato yohihibo jaiya, hani chihi perehihnatai qui Papan jato potanon.

¹⁰¿Jascajaquin hen mato yohihi tsoa queenaiya hen yohihin? ¿Jonibo queenai hin? ¿Papa queenai nan? ¿Jonibaan costanai quescari hea yohuanai nan? Jonibaan costanai joi yohinicahax cahen Cristo hahxonnica jayamahan.

Criston Pablo jahuen raanti jani

¹¹Hen mato yohinon, nincanahue, hea huetsabaan. Hen mato yohini joi siri ta jaabaanbi shinanax jonibo yohuanai ma qui. ¹²Noquen xenibo yohuanai ma ta qui, tsoanbi ta hea jaa joi haxemayamanishqui. Jesucristonbi ta hea yohinishqui, hea jahuen yohinica hihnon.

¹³Judio joi nincanica hihparixon hen hahpahoni tah man chanihah nincanishqui. Jato hihti tiromajanoxon tah hen Papan baquebo chibanpahonihqui. Tiromaja tah hen jato japahoniqui, Papan joi nincacaibo queyocatsihquin. ¹⁴Heen xenibaan joi hihti nincanicacatsihxon tah hen coshin

teexon hehbe haxehibo hean mahuinbahinnihqui, jato yohinicascanoxon. ¹⁵Jascapahax bi tah hen pontenihqui. Heen maman hea bihnon ta Papa Diosen hea janenishqui, jahuen raanti hen janon. Hani sca hen jaiya ta hehon shinanxon hea yohinishqui, jahuen baque hehqui raanxon. Jaatian sca tah hen pontenihqui. ¹⁶Hehqui cainxon ta hea yohinishqui judiomabo hean jahuen joi siri yohihi canon. Hea yohihah tah hen manataxma caniqui, tsoabi yohuanquihnoxon manayamaquin. ¹⁷Caibo jahuen raantibo rihbi neateman jan yohini tah hen Jerusalem janin jisi cayamaniqui. Arabia main tah hen caniqui. Jano canish tah hen Damasco jema janin joribiniqui.

¹⁸Noquen Hihbaan hea yohini pecaho quimisha bari hihquish tah hen Jerusalem janin sca caniqui, Pedro jisi. Rabe semanah tah hen habhetan janiqui.

¹⁹Papan raanti huetsa tah hen jisyamaniqui, Jacobo huesti, noquen Hihbaan jochica. ²⁰Huishaxon hen mato yohihi ta hihcoina siri qui. Hen tah hen quesayamahi. Papan ta honanishqui.

²¹Jaa pecaho tah hen Siria mai janin caniqui, Cilicia mai janin rihbi. ²²Judea mai janinha noquen huetsabaan ta hea jisyamanishqui. ²³Hea jixsonma ta joi res nincacannishqui, Noque tiromajapahonixon bi ta rahma Papan joi yohisciqui, jaa joi queyocatsihpahonixon. Hea pontéscari yohihah ta nincanishqui. ²⁴Hea noquen Hihbaan teemascai honanah ta Hihti siri bi res tah min qui Papan, hihcannishqui.

Jahuen hahbe raantibo

2 ¹Catorce bari jano nichish tah hen Jerusalem janin caribiniqui. Bernabé rihbi ta hehbetan canishqui, Tito rihbi. ²Jano cahue noquen Hihbaan jaah tah hen caniqui. Nocoxon tah hen hean

yohihi joi siri jato nincamaniqui, judiomabo hean yohipahoni joi siri jenquetsahpa hin hihxon janohahbo yohiquin. ¿Yanca tee tee hen jain? Jaamajaquin hean coshichahinxon yohipahonihquin hihxon tah hen jaton xenibo sca hahme rihbi yohiniqui. ³Hehbetan Tito cahi bi ta jaton nahua hihqui bi judiocahinax noquen honantiyapahue hahyamacannishqui. ⁴Moisesnin yohini quescajati ta jaiqui, Papan jihuetahbo janon tah non jato honantijati jai hih quesabo jai bi tah non jeen hahyamaniqui, ni pishcabi. Jaa quesabo ta noquen huetsabohicamahax hihcoxon noque quexenishqui, hahan honanti yamahiquin hihxon. Non tah non jato yohiniqui: Criston jihuetahbo janoxon tah non Moises nincati pishinyamahi, Cristo qui hinamehxon jaa huesti sca nincaquin, hahquin. ⁵Criston joi coin huetsajayamahahbo hihxon tah non jato honantijati jeen hahyamaniqui. Criston joi siria res man banenon, huetsa joi mato yohiyamahahbo.

⁶Jerusalem janinhahbaan ta noque mahuinyamahiqui, hapo quescahboxon bi. Papan jisí ta jatihibi jascapah rahsi qui. Hea nincaxon ta jahua hashoan yohiti pishinyamahiya Jasca tah qui hahxon, hean haxemahi joi qui jahuabi hashoan tsamanyamacannishqui. ⁷Jahua hashoan yohiti yohiyamacanquin. Judiobo yohinica Pedro hihnon quescajaribiquin Judiobo yohinica hea hihnon Papan noque caisni jixson, Man haxemahi quescajaquin haxemanahue hahcanquin. ⁸Judiobo nincamaquin sirijanoxon ta Pedroyaxon noquen Hihbaan jato nincamahiqui. Jascajaquin rihbi ta judiomabo nincamanoxon heyaxon judiomabo nincamahiqui.

⁹Hea rihbi Criston raanti joni hihqui jixson ta Jacobo, Pedro, Juan, jaabo rahsi tah hapo quescahboxon, Jascanonbonahue,

judiomabo yohitannahue, noquen non judiobo yohinon hahcannishqui. Noque jascjaxon ta noque jomaquin sca hehbetan Bernabé jaton hahbe teenicabo copi noque mehuettannishqui. ¹⁰Jerusalen janinha yomanahitaibo non shinanbehnoyamanon ta noque yohicannishqui, jaa res. Noquen rihbi tah non yanapanti queenxon jascjaxati yohiniqui.

Pablonen Pedro ponteni

¹¹Jaa pecaho ta Antioquía janin Pedro jonishqui. Jan janoxon jaamajahiya tah hen ponte res yohiniqui caibaan nincanonbi. ¹²Jacobo janinhax huetsa hahbe judiobo nocorihyamahiya ta judiomabo noquen huetsabo betanbi Pedronen pinishqui. Nocoscaibo ya ta judiobo hahqui yohuanmis hihxon jato piquihnyama sca janishqui, huetsa shinan hahcaxquin. ¹³Teixe judiobo rihbi ta hahbetanbi huetsapahcannishqui, jaton nahua betan pitimahicamahi. Bernabé rihbi jascari, shinan cahcoya sca. ¹⁴Cahcotax ponteyamascaibo jixson tah hen jatihibichin nincanon Pedro yohiniqui: Mia tah min judio hihquish bi judio quescayamahi jihuetai. Judio quescapahmaxon ¿jahua copi sca min judiomabo judionon jato yohihin?

Jascapah rahsi queyoyamanox manatai

¹⁵Rabebi tah non judio qui. Noquen papabo cahen nincayosma nahuabo hihiyamanish. ¹⁶Moisesnin yohini quescabijaquin hahxon bi cah non jascaxquin noquen hohcha potatimahi, Papan noque siri jisnon. Jesus Cristo qui hinamehxon non nincacoinaiya pari ta Papan noque siri jisiqi. Jaa copi tah non non rabebi hinamehniqi, jaan noquen hohcha sohuahiya Papan noque siri jisnon, Moisesnin joi nincacoinax jihuexon tah non hohcha

potatimabiresai, tsoanbi. Judioxon bi tah non rabexonbi honanai.

¹⁷Cristo huestichin ta noque hohcha sohuati hahtipahiqui, Papan noque siri jisnon. Judiomabo hohchayahpa hihqui quescax rihbi tah non hohchayahpabo qui, noque rihbi. ¿Jaa copi non Criston ta noque hohchamahiqui non hihtihin? Hihiyamabiresi rahan. ¹⁸¿Non jenen joi non bihtihin? Joi siri jenenihxon pari, nincati joi copi. ¹⁹Moisesnin joi ta noquen nincati joima sca qui. Jaa joi nincaqui jaxon tah hen hea hohchayahpa hihqui hen honannihqui. Hahqui mahuatah quescaxon tah hen jaa nincayamascai. Noquen Papa Dios qui sca tah hen jihuetai. ²⁰Cristo betanbi tah hen mahuaniqui. Hen queenai quescayama sca tah hen jai. Cristo queenai quescascai, hahbetanbi jihuetai. Papan baque nincacoini tah hen jihuescai, jan hehon shinanax hea copi hinamehni honanax tah hen nincacoini jihuescai. ²¹Noquen hohcha copi Cristo mahuan ta hani shinan qui. Papan noque hahxonai jahuama quescapi tah hen jayamahi. Moisesnin yohini quescaxquin hahxon noquen hohcha potati non hahtipahiya cahen Cristo yanca res mahuatan.

Cristo huesti qui hinamehti

3 ¹Honanmabo tah man qui, Galacia mehaxon. Jatihixonbi nincacahbo tah non sirijaquin mato yohiniqui. Jesucristo noquen hohcha copi jihuin hueonah mahuan mato yohiquin. ¿Tsoan paranah man huetsa joi sca bichin? ²Nea res hea honanmanahue: ¿Jenquetsahaxon man Papan yoshin siri bihniquin? ¿Moisesnin yohini quescaxon nan? ¿Noquen Hihbi qui hinamehxon man bihiyamaniquin? ³¿Yotiho honanyama man jain? ¿Papan yoshinya pehocohxon non mai mehakaan shinanai quescaxquin sca noquen shinan

caĵatihin? ⁴ĈPapan mato yanca res hihti hahxonihquin? Yanca hahyamapahinon.

⁵ĈJahuen yoshin siri mato hinanxon hahan rahtetijaquin Papan mato hahxonai cahran? ĈMan jahuejahiya mato hahxoniquin? ĈMan Moisesnin joi chibanaiya nan? ĈMan nincacoinax noquen Hihbo qui hinamehtaiya nan? Hinamehti rahan.

⁶Papan Abraham yohini quesca tah qui. Abrahamen nincacoinaiya ta Papan siri jisnishqui. ⁷Nincacoinaibo ta Abrahamen baquebo qui. Jaa cah man honanai.

⁸Nincacoinaiya jatihibi jonibo Papan siribo jisayahqui ta neateaman jaan yohinishqui. Abraham yohiquin: Min nincacoinai quescapahiya tah hen jatihibi nahuabo hahxoncoinyaxihqui hihqui jan huishani joi. ⁹Jaa copi honannahue: nincacoinaiya Abraham hahxonquin ta texe jonibo rihbi Papan hahxonihqui, nincacoinaiboya.

¹⁰Papan jato siribo jisnon hihxon Moisesnin joi chibanaibo ta jaan hahxonai'boma qui; jaabo ta jaan casticanaibo qui. Huishani joi jai quesca tah qui. Nea quirica janin jai joi jatihibi tah man nincatihi, hahnoxon. Nincati pishinaibo jatihibi tah hen casticantihi hihqui jahuen huisha. ¹¹Moisesnin yohini quescajahibo tsoabi Papan siri jisyamahi ta huetsa huisha joi janin jaiqui, hahan honanti bi res: Papan siri jisi joni ta nincacoinax hinamehtax jihuetai qui, hihqui. ¹²Moisesnin ta hinamehti yohiyamanishqui. Nea joi nincaquin tah man hahqui jihuetaihi hih ta janishqui.

¹³Moisesnin yohini casticanti noque qui paquepanan ta noquen casticanti bihxon Criston noque paxajanishqui. Huishani joi jai quesca: Jihuin hueonah ta casticana rahsi qui, hihqui. ¹⁴Jesucristonen noque hahxonni copi sca ta jan Abraham yohini quescajaquin judiomabo Papan siribo sca jisiqui. Jaa copi tah non nincacoinax

hinamehxon jahuen yoshin siri bihresscai, jan hinantijani.

Cristoyahpabo res Papan hahxonai

¹⁵Non hinantijaquin hahcai quesca tah qui, heen huetsabaan. Mahuaquin noque hinantijahax noquen huetsa mahuatipi pecaho tah non tsoanbi jan hinantijaquin yohihipi joi huetsajayamahi, jahuabi tah non jaa joi qui rechiyamaribhi. ¹⁶Papan ta Abraham jahuen baqueyabi hinantijanishqui. Hinantijaquin jan yohihi ta Miin baqueyabi tah hen jaa rahsi mia hinanyaxihqui, hahnishqui. Miin baqueboyabi hih ta jayamanishqui, hicha yohiyamaquin. Huesti res, Miin baqueyabi, hihqui, Cristo yohihi. ¹⁷Hinantijanixon ta cuatrocientos treinta bari pecaho Moises sca huishamaxon jaa huisha join jan hinantijani joi Papan huetsajati hahtipahyamanishqui. ¹⁸Moisesnin joi cananquin hahcajaquin jonibaan jahuen jihuetai bichiya cahen jan hinantijani quescayama sca jaquehahna. Jascabi hinanresti cahen jan Abraham yohinish.

¹⁹ĈJascaraiya jahua copi sca Moises huishamanishquin? hih ra tah man jai. Jaa joi ta hahan honanti qui, jenquetsahpa tironicahbo non quin non honannon. Jahuen quiquin baque jonon caman res jaa joi nincacahbo ta Moises huishamanishqui, jan hinantijani jahuen baque noconon caman. Jahuen yonotiboyaxon ta Moises nincamanishqui, yohinicahxon Moisesnin sca jahuen caibo yohinon. Hicha yohihibo jaiya ta yohuanxonnica hihquitihiqui. ²⁰Huestichin yohihiya cahen yohuanxonnica pishinyamascan. Hinantijaquin ta Papa huestichin yohinishqui, jaa copi tah non yohuanxonnica Moises pishinyamascan.

Jato haxemanoxon Moisesnin yohini

²¹Papan hinantijati joiya Moisesnin joi bahi cahchinanicama jayamahiquin hih

sca rah tah man jai. Hihyamahi rahan hih sca tah hen jatihi. Moisesnin huishani joi hahan jihuetai joi hihquiya cah non jaa joi nincaquin noquen hohcha potati hahtipahan. ²²Jaa join tah non honanai, hohchayahpabo rahsi non hihqui. Jaa copi ta Jesucristo qui hinamehtaibo rahsi qui jan hinantijani Papan hinanyaxihquiqui, jaa nincacoinaiboya.

²³Jesucristo qui hinamehti noque yohiyamaparixon ta Moises pari Papan huishamanishqui, jaa joi jai quescabijahi non jihuenon. Jasca tah non japahoniqui, noquen Hihbo qui hinamehti noque yohiscanon. ²⁴Jaa copi ta Moisesnin joi noque hanijaquin hahcajaan quescanishqui, non Cristo sca bihnon. Hahqui hinamehtax hohchajomabo sca Papan noque siri jisnon hanijaquin hahcajaan noque honanmaquin. ²⁵Ma hinamehscaax tah non hanijanicah pishinyamascai.

²⁶Jesucristo qui hinamehtax tah man Papan baquebo rahsi qui. ²⁷Cristo qui nashimaha tah man Criston sahuemaha jahuenahbo rahsi sca qui. ²⁸Judioboya nahuabo tah non hihyamascai. Patoroyahpaboya patorojomabo hihyama sca jai. Haiboboya bebobo hihyamascai. Jatihibi scah tah man Criston yoraya qui, jaa huesti. ²⁹Cristonah hihquish tah man Abrahamen baquebo sca qui. Abrahamen baquebo man jaiya cahen mato hinantijanixon Papan mato hinantih.

4 ¹Non japahoni ta patoronen jahuen baque hanijati yohihi quesca qui. Baque pishca parihax ta jahuen papan joni quescapah qui, jahuabi hihboyamahi. Jahuen papan jahuaborabo jatihibi hihboyahnoxihqui bi jahuabi hihboyamaparihi. ²Haxemanicahton haxemahah ta haxehiqui. Hanijanicahthon yohihah, nincaquin, jahuen papan yohini nete noconon caman. ³Jascapahbo tah non japahoniqui. Cristo qui

hinamehyamaparixon tah non baque pishca hahcajaan noquen nincati joibo nincapahonihqui, haxehax noquen xenibo hihni quescari jihueyahnoxon. ⁴Non jascapahbo jihuetai bi ta jahuen raanti nete nocoscaiya jahuen baque Papan raannishqui. Jaan raanah ta haibaan baquexo sca cainnishqui. Moisesnin yohini quesca ta jaxonnishqui. ⁵Noque ta hahxonnishqui, Moisesnin joi nincaqui non jihueyamascanon, Papan baquebo sca.

⁶Jahuen yoshin siri ta noquen jointi janin Papan jananishqui, jaan yohuanmaha non Papan hihnon, noquen joinbi. Jaa copi honannahue, Papan baquebo man hihqui. ⁷Hinabo tah man hihyamascai, Papan baquebo sca. Jahuen baquebo jaan mato hihmahah cah man jahuen baqueboxon jan hinantijani man bihtih.

Shinan rabeyahpabo qui Pablonen masa shinanai

⁸Noquen Papa Dios honanyamaparixon tah man huetsajaan shinanpahonihqui, huetsabo dios hihqui man shinanah bi tah man jaamajapahonihqui. ⁹Papa Dios tah man honanscaniqui. Hashoan ponte yohuani tah hen Papan ta mato honannishqui, hih hen jatihi. Jascapahboscaxon, jenquetsahpahi man japahoni quesca sca hahan hanitima shinanbo man bihribicatsihquin? ¿Jenquetsahpahi man yanca res yohuanai joi chibanrihbicatsihquin? ¹⁰Netebo, hoxnebo, baritianbo, jenetianbo, jascapahbohiya tsinquinicabo tah man qui Papan noque siri jisnon hihquish tsinquiti. ¹¹Jaa copi tah hen tiromajaan shinanai. Yanca bi res cahran hen Papan joi mato nincamaniquin hih tah hen jai.

¹²Mato tah hen hihti yohihi, heen huetsabaan. Hea hihqui quescanahue. Mato quescapah tah hen janiqui. Hea

jano cahiya tah man nincanihqui.

¹³Hisinax copi tah hen mato qui banenihqui. Hisinax banexon cah hen Papan joi siri mato nincamani. ¹⁴Hea hisinyahpa que bi tah man hea rahnninxonma Johue hahniqui. Hea tenexon tah man Papan yonoti yohiquin hahcajaxon hea Johue hahniqui. Jesucristo yohiquin hahcajaxon hea sirijaquin bihquin. ¹⁵Hen yohihah tah man hihti jenimaniqui. Hahtipahxon tah man maton bero tsecaxon hea hinanquehannihqui. ¿Jahua copi sca man shinan huetsajahin? ¹⁶¿Hen mato pontejaquin yohihah man maton rahui sca hea jisín?

¹⁷Mato tiromajanoxon ta Maton tah man sirijahi hihcaniqui. Bahi xehpoquin hahcajaquin ta mato mayamacatsihcaniqui, huetsa bahi man chibannon hihxon. ¹⁸Sirijahiton yohihah ta siri qui, Mian tah min sirijahi hahquin. Jaa ta jatihibi tian yohihah siri qui, heen baquebaan, hea mato janin hihquiya, hen jano hihyamahiya, jascarihbihi. ¹⁹Man Criston shinan bihnon tah hen hihti queenai, heen baquebaan, hisini quescasca tah hen jai. ²⁰Jenquetsahpa shinanya man quin hihxon tah hen masa shinanai, heen jananbi sca mato yohinoxon hea jano rahmabi hihpahinon.

Agarya Sara

²¹Moisesnin yohini joi chibancatsihxon hea yohinahue. ¿Nea jahuen huishani joi man honanyamahin? ²²Abrahamen ta rabe baque janishqui, huetsa cahen jahuen xobohoxon teexonnica haibo quihah, huetsa cahen jahuen haibo quihah. ²³Huesti cahen jaanbi jahuen hina haibo qui baquejanish. Huetsa cahen jahuen haibo quihah, jaa jayaxihqui Papan yohinih. ²⁴Jaa haibo rabe janí quescasca ta rahma jaibo qui. Rabejaquin Papan yohini quescasca tah qui.

Jan yohimenoni ta Sinái mahchi janinxon noquen xenibo yohinishqui, hinapan baquebo sca jaábo. Agar ta jaa hiná qui, jahuen jane. ²⁵Agar ta jaa Arabia mai janin Sinái mahchixon yohini joi quescasca qui, rahma jai Jerusalen quescasca. Jahuen baquebo ta hinabo qui, jaton mama quescapahbo. ²⁶Huetsa ta quiquin Jerusalen qui, hinama, jaa cahen noquen mama. ²⁷Huishani joi jai quescasca tah qui:

Baqueyosma ta baque bihyamanish bi hihti jenimascaciqui. Jahuentianbi camitaxma bi ta jenima behuahihqui. Baquejoma hihnish bi ta hicha baqueyahpascaciqui, beneyahpa haibo mahuinbahirquin hihqui jaa huisha joi.

²⁸Mato tah man Papan hinanni baquebo qui, jan hinantijani. Isaac quescasca tah man qui, hea huetsabaan. ²⁹Jaa hina haibaan baquebaan neateman Dios Yoshiman baquebo tiromajapahoni quescajaribiquin ta rahma jacanihqui. ³⁰¿Jaabo yohiquin jahuaaja hen Papan janishquin? Jaa baqueyabi hina haibo potahue, hinapan baquen ta hinantijani baque betanbi heen hinanti bihtimahiqui, hahquin. ³¹Jaa copi honannahue, hea huetsabaan. Hinapan baquebo tah non hihyamahi. Quiquin haibaan baquebo tah non qui.

Man queenai quescari jihuenahue

5 ¹Hinabo non hihyamascanon ta Criston noque piconishqui. Papan noque siribo jisnon tah non Moisesnin yohini quescajatihí hihxon mato hihboyahpabo hihmarihbicanmis. Hiná tejoquin hahcajaquin mato bihcanmis. Jato nincayamanahue.

²Hea Pablonen tah hen mato hihti yohihi: Papan mato siri jisnon hihxon hahan judio honantiyahpajaquin maton yora man honantijahiya ta Criston mato jahuabi hahxontimahiqui. ³Jascajaquin

hahan honanti bichibo jatihibi tah hen sirijaquin mato yohihi: honantiyahpaxon tah min Moisesnin yohini jatihibi sca min hahtih, jahuabi pishinmayamaquin.

⁴Papan mato siri jisnon hihxon Moisesnin joi chibanax tah man Cristojomabo sca qui, Papan mato hahxonni tah man yamascai.

⁵Noquen tah non hinamehxon jan noque siri jisi non honanai. Jahuen yoshin siripan noque manahah tah non tenehi, jan noque hahxontijani hihti jiscatsihquin. ⁶Jesucristo qui hinamehtaiboxon tah non nincacoinxon joni huetsahon shinanti jai, jato betan yanapanhanani. Judio honantiyahpa jaah ta jahuajoma qui. Jaa honantijoma jaah jahuajoma rihbi.

⁷Siripi tah man nihpahoniqui. ¿Tsoan pantehah man joi coin nincayamascaín?

⁸Jaa nincacointi shinanyama man jai ta noquen hihbaan mato hinanyamahihqui. Mato quenanihon ta jascapah hinanyamahihqui. ⁹Hichatahma hahan paan soohihmati niahah tonco moanman soohihqui quessa tah man jai. ¹⁰Hen mato yohihi quescabijaquin tah man shinanxihqui. Honan tah hen jai. Criston ta mato yanapantihiqui. Mato jatsanjahibo ta Papan

casticanyaxihquiqui. Tsoabo rah ta qui.

¹¹Judio honantiyahpati ta jai qui hih roqui hea jai. Jascari yohuanpahonish bi tah hen jascayamascai. Jaa copi ta hea tiromajacaniqui. Honantijati yohixon tah hen Cristo qui hinamehti yohiyamaquehanai. Tsoabi ta hehqui sinayamaquehanihqui. ¹²Mato honantijacatsihquin jatsanjahibo jaabobi xatehixtax jobojomascapahinon hih tah hen jai.

¹³Moisesnin joi nincaqui jihueta ta Papan mato yohiyamahihqui. Man queenai quessa jihueta ta yohihihqui, heen huetsabaan. Man queenai quescarax jihueta bi man hihpahoni quescayamanahue, mai mehabaan

shinanai quescayamahi. Joni huetsahon hihti shinanxon, joni huetsa yanapanquin hahxoncoinnahue. ¹⁴Papan huishani hani joi ta nea qui: Miin hahbe jihuetai jonihon shinanhue, min miabi shinamehtai quescajaquin, hihqui. Jaa joi huesti nincaxon hahxoncoinquin tah non Moisesnin yohini jatihibi hahresscai. ¹⁵Yohinahnen hahcajaquin man joni huetsa jamis joni huetsa piquin xehahihnihax man queyocahinmis.

Rabe shinan:

Dios Yoshimana,
mai mehabaana

¹⁶Papan yoshin siripan mato shinanmahi quescanahue. Jaatian tah man mai mehabo queenai quescayamascati. ¹⁷Mai mehabo queenai quescati ta huetsa qui, neaho jahui. Dios Yoshin queenai quescati ta huetsarihbiqui, jaho cahi. Noque ninanbehcoinai shinanbo tah qui. Huetsa, jonibaana. Huetsa, Dios Yoshimana. Jaa copi tah man man shinanai quescajacatsihqui bi huetsan ninihah man hahyamascai. ¹⁸Jaa copi ta Dios Yoshiman mato shinamaha man Moisesnin huishani nincati pishinyamascai.

¹⁹Mai mehabaan shinanbo ta honantih bi res qui: tsiniti, rishtaya yohuanti, huetsa haibo betan hihresti, ²⁰yoshinbo qui samati, yobeti, sinati, rehtenanti, yohuashihti, sinajati, notsiti, huesti shinanya hihtima, joni huetsa qui rainyamati, ²¹caibaan jahuaborabo bichinti, joni rehteti, pahenti, pahenax cahtimahti, texe jascapa shinanbo rihbi. Hen mato yohini quescajaquin tah hen mato yohirihbiscai, jascapahbo shinanya ta Papan jihue janin hihcotimabiresihqui.

²²Dios Yoshiman hinanai shinanbo ta nescapahbo qui: joni huetsahon shinanti, jenimahi jihueta, joni huetsa betan coincoini jihueta, teneti, sirijaquin yohuanquihnti, caibo hahxonti, nincacointi,

²³sinaxonma honaxonbi yohiti, yobacahinti. Jascapah ta siri qui. Jascatima joi ca jahuenbi yamaha. ²⁴Criston joniboxon tah non rehtequin hahcajaquin noquen mai meha shinanbo potanihqui, mai mehabo queenai quescayamascai, mai mehabaan shinanai quescayamascai. ²⁵Dios Yoshiman noque jihuemaha, jaa queenai quescari sca jihuenahue.

²⁶Shinanihcamaxon paranaibo hihamascanahue, joni huetsa qui rainyamayamascai, huetsa jonin jahuabora jisish jahuenta hean bihpahinon hihamascai.

Yanapanhanannahue jato jai

6 ¹Jaamajahax hohchataiton noquen huetsa meraxon, Dios Yoshiman shinanmahiboxon honaxonbi yohixon pontenahue, sirijaquin yohixon. Coiramexon yohinahue, mato rihbi man paquemis. ²Hiacaibo yanapanquin hahcajaquin noquen huetsabo teneti yanapannahue, tenehahbo. Jascajaquin tah man Criston yohihi quescajatihi.

³Jahuabi hihamahax bi hihti shinanyahpa hihqui shinanax tah non paramehscai. ⁴Jenquetsahpa hin hihxon miin jihue jise. Jaatian tah min hicha tahni sca shinan jaax, hen tiromapahoni quescayama sca tah hen jai hih min jatihi. Caibo tah hen mahuinai hih tah min jatimahi. ⁵Jatihibichin papiquin hahcajaquin tah non tenetih noquenahbi.

⁶Papan joi mato yohihi joni yanapannahue, piti siriboya jahuaborabo jatihibi hinanquin.

⁷Paramehyamanahue. Jan yohini quescabijaquin ta noquen Papan jaiqui: man nincayosmamis, Non bananilh quescas tah non jai. ⁸Non queenai quescajaquin mai meha shinanbo bananixon tah non tiromabo bihtih. Dios Yoshin queenai quescajaquin jahuen shinan siri bananixon tah non queyoyamanox manati bihtih.

⁹Caibo sirijaquin hahxonijatsanyamanahue. Non yosmayama hiya ta jaa queenai tianbi copiquin sca noquen Papan noque sirijaquin hahxonrihbiyahixihqui. ¹⁰Jaa copi hahtipahxon tihibi joni huetsa hahxonquin yanapannahue. Noquen huetsabo hashoan hahxonquin yanapanquin.

Queyonoxon jan hihti yohihi

¹¹Heanbi tah hen nea huishahi.

Hanibojakin hen huishahi jisnahue.

¹²Jaton jonibo man janon ta mai mehabaan mato hahan judio honantiyahpati yohicaniqui. Papan noque siribo jisnon ta mahuaquin Criston hahxonishqui hihtihibi ta judiobo jato qui sinamis hihxon, honantiyahpati yohicaniqui. ¹³Jaa honantiyahpabaan ta Moisesnin yohini quescajayamacaniqui. Jaabo tah non honantijatanai hihnoxon res ta mato yora honantijacurini. ¹⁴Mahuaquin ta noquen Hihbo Jesucriston hea hahxonishqui. Jaa huesti copi ta Papan hea siri jisiqui. Huetsa joi ta yamabiresi qui. Criston hea hahxonah tah hen mai mehabaan shinan queenyamabiresai, mahuatahbo quescari. Hea rihbi jascapa shinan qui mahuatah quescas, hehqui jotimascai. ¹⁵Papan jisi ta judio honantiyahpabo jahuen siriboma qui. Jaa honantijomabo rihbi jahuen siriboma. Behna shinanyahpa jonibo res ta jaan siribo jisiqui. ¹⁶Behna shinanyahpahax jihuetiabo Papan shinannon, jan jato hohcha sohuanon, hih tah hen jai, jahuen quiquin israelibo yohihi.

¹⁷Moisesnin huishani joi copi hea yocayamascanahue, hih tah hen jai. Heen yora janinbi tah hen hahan honanti hicha jai. Jesusen joi hen yohihi copi hea rishquinihbo nabaya tah hen qui.

¹⁸Noquen hihbo Jesucriston shinan maton jointi janin janon tah hen yocaxonai, hea huetsabaan. Jascari rahan.